

Protocolo de colaboración entre o Parlamento de Galicia e a Fundación Galicia Obra Social para o desenvolvemento de actuacións conxuntas de interese común no eido da promoción e divulgación dos seus fondos artísticos e actividades culturais

R E U N I D O S

Dunha banda, o **Excmo. Sr. D. Miguel Ángel Santalices Vieira** na súa condición de presidente do Parlamento de Galicia, actuando ao abeiro das facultades que lle confire o artigo 31.1 do Regulamento do Parlamento de Galicia.

Doutra, o **Sr. D. Miguel Ángel Escotet Álvarez**, na súa condición de presidente da Fundación Galicia Obra Social (a seguir, "Afundación"), entidade con personalidade xurídica propia e plena capacidade para o cumprimento dos seus fins segundo figura, en particular, no Rexistro de Fundacións de Interese Galego, Sección da Consellería de Facenda, da Xunta de Galicia, onde se atopa inscrita a Fundación co número 2013/12.

Ambas as partes recoñecen a súa competencia e capacidade para formalizaren o presente protocolo, e para tales efectos,

E X P O Ñ E N

Primeiro. O Parlamento de Galicia conta cunha valiosa e variada colección de arte galega, con representación das principais figuras da pintura e escultura de Galicia. Este fondo artístico está integrado por duascentas trinta e seis obras pertencentes a oitenta e catro artistas significativos na historia da arte de Galicia, e dá mostra do compromiso desta institución na promoción cultural e patrimonial da expresión artística galega. Neste sentido, o propósito do Parlamento de Galicia é seguir contribuíndo a facilitar o seu coñecemento, promoción e consolidación, dispoñendo, para tal fin e na medida das súas posibilidades, dos medios que sexan necesarios e eficaces para conseguilo.

Segundo. Os estatutos de Afundación determinan entre os fins previstos dela a atención e desenvolvemento da súa obra benéfico-social, e o apoio á cultura, mediante actividades realizadas directamente, así como a través da colaboración con outras entidades. A colección de arte de Afundación está conformada por un extraordinario patrimonio artístico e cultural que a converte nunha das iniciativas artísticas corporativas más importantes de Galicia, e unha das más importantes de España. O fondo artístico está integrado por cinco mil cincocentas seseta e unha obras pertencentes a dous mil douscentos corenta e nove artistas significativos polo seu papel na historia da arte desde o século XIX, tanto dentro como fóra de Galicia.

Terceiro. Ambas as institucións enmarcan a súa actuación de protección e promoción dos seus bens culturais na Lei 5/2016, do 4 de maio, do patrimonio cultural de Galicia, a respecto de cumplir cos deberes establecidos nesta lei para a protección do patrimonio cultural de Galicia, así como ser partícipes na súa conservación, acrecentamento, difusión e fomento, favorecendo procesos de cohesión social, fundamento da identidade cultural do pobo galego, así como a valorización e a investigación do patrimonio, en calquera das súas manifestacións, e mais a transmisión ás xeracións futuras.

Cuarta. É vontade de ambas as institucións colaboraren no desenvolvemento de iniciativas conxuntas de dinamización da promoción e do intercambio dos seus bens culturais, fondos artísticos, así coma promoveren conxuntamente a difusión da arte e da cultura galegas mediante estudos, publicacións, exposicións e investigación.

Para estes fins, no exercicio das competencias que lles son propias, as partes recoñécense mutuamente plena lexitimación, capacidade e representación para o asinamento deste PROTOCOLO DE COLABORACIÓN, que se rexerá polas seguintes

Cláusulas

Primeira.-Obxecto e fins do Protocolo

Este protocolo ten por obxecto establecer os mecanismos de colaboración entre o Parlamento de Galicia e a Afundación, para fixar o marco xeral de actuación das súas respectivas administracións e organizacións na promoción, avdinamización e o impulso dos fondos artísticos e culturais de ambas as entidades, así coma a organización de eventos conxuntos para tal fin.

Desenvolverán tamén accións conxuntas de colaboración con respecto ao patrimonio cultural galego en calquera das súas manifestacións.

Segunda.- Compromisos das partes

O Parlamento de Galicia e a Afundación, en coherencia coas súas respectivas funcións e no marco deste protocolo, comprométense a colaborar no desenvolvemento dos seus fins, a través de accións que se plasmarán a través dos correspondentes convenios de colaboración, de modo que se propicie:

- unha maior difusión dos seus fondos artísticos mediante a organización de exposicións, intercambios de obras;
- a investigación, o estudo e as publicacións das súas obras, autores, temáticas, que abonden no coñecemento e na difusión deste valor artístico cultural;
- a promoción do coñecemento, protección e axuda aos bens do patrimonio histórico e cultural de Galicia;
- así coma o fomento e o enriquecemento cultural a través de actividades propias cos fondos artísticos, os arquivos, os centros de documentación, as bibliotecas, etc.

Para tal fin, ambas as partes comprométense a desenvolver no futuro actividades expositivas, xornadas, estudos ou calquera outro tipo eficaz de actividade informativa e divulgativa que teñan como obxecto principal a promoción dos seus fondos artísticos e bibliotecas, así como do valor patrimonial e arquitectónico dos seus edificios históricos.

Terceira .- Financiamento

O asinamento deste protocolo non comporta ningunha obriga económica. De ser o caso, determinarase nos correspondentes convenios de colaboración que deriven deste protocolo.

Cuarta .- Difusión da colaboración das partes

Nas actividades que supoñan intercambio de fondos, expositivas, divulgativas e nas actuacións respecto das publicacións que se fagan relacionadas co desenvolvemento deste protocolo farase constar a colaboración das partes e utilizaranse, de procecer, a identidade corporativa de cada unha das institucións.

O asinamento deste protocolo supón o consentimento expreso de ambas as partes para faceren públicos a través dos distintos soportes de comunicación e difusión que se empreguen os datos referidos ao seu contido de conformidade coa normativa sobre transparencia e boas prácticas que sexa aplicable a cada unha delas.

Quinta.-. Prazo de vixencia, modificacións e causas de resolución

Este protocolo producirá efectos a partir da data do seu asinamento e terá unha vixencia dun ano, prorrogable por períodos sucesivos anuais ata un máximo de catro anos, mediante acordo expreso das partes ao remate de cada período, agás que se resolva por algunha das causas seguintes:

- a) Mutuo acordo das partes manifestado por escrito.
- b) Denuncia feita por calquera das partes, con tres meses de antelación.
- e) Incumprimento grave de calquera das partes dos acordos do Protocolo.

Así mesmo, as partes poderán modificar os termos deste protocolo de acordo mutuo.

Sexta.- Comisión de seguimento

Coa finalidade de asegurar o cumprimento dos convenios que se asinen en desenvolvemento deste protocolo, crearase unha comisión de seguimento composta por un representante de cada unha das institucións, que coordinará o seu desenvolvemento e estará facultada para resolver cantas dúbidas poidan xurdir na súa execución, e poderá estar asistida polos técnicos que xulguen necesarios.

Os acordos adoptados pola Comisión serán inmediatamente executivos.

Terá, ademais, as seguintes funcións:

- 1º. A interpretación do protocolo.
- 2º. A proposta de addendas ou modificacións.
- 3º. A elaboración do informe previo á resolución por incumprimento.
- 4º. As facultades de supervisión da execución e adopción das decisións e o ditado das instrucións necesarias co fin de salvagardar a correcta realización das actividades acordadas.
- 5º. Calquera outra relacionada co bo funcionamento deste protocolo.

Sétima.- Natureza xurídica

Este protocolo de colaboración ten natureza administrativa, está excluído do ámbito de aplicación da Lei 9/2017, do 8 de novembro, de contratos do actor público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, e rexerase polas súas propias cláusulas e, de forma supletoria, polas normas xerais do derecho administrativo.

As partes comprométense a resolver de maneira amigable calquera desacordo que puider xurdir no desenvolvemento deste protocolo.

As cuestións litixiosas que poidan xurdir na interpretación ou no cumprimento do presente protocolo de colaboración, e que non poidan ser dirimidas pola Comisión de seguimento creada para tal efecto, serán de coñecemento e competencia da orde xurisdiccional do contencioso-administrativo.

Oitava.- Protección de datos de carácter persoal

En cumprimento do disposto no artigo 5 da Lei orgánica 15/1999, de protección de datos de carácter persoal, infórmase de que, de existiren no eido deste protocolo datos de carácter persoal, as dúas entidades incorporaranos aos seus respectivos ficheiros para o seu tratamento, coa finalidade da xestión deste procedemento. As partes poderán exercer os dereitos de acceso, rectificación, cancelación e oposición previstos na devandita lei.

Novena.- Transparencia e bo governo

O asinamento deste protocolo de colaboración leva implícito o consentimento expreso das persoas intervenientes para que o Parlamento de Galicia poida fazer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo governo, e a Lei galega 1/2016, do 18 de xaneiro, de transparencia e bo governo.

En proba de conformidade, asínase o presente Protocolo por triplicado no Pazo do Parlamento, en Santiago de Compostela, o vinte e oito de maio de dous mil dezaoito.

Miguel Ángel Santalices Vieira
Presidente do Parlamento de Galicia

PARLAMENTO
DE GALICIA
PRESIDENCIA

Miguel Ángel Escotet Álvarez
Presidente de Afundación
